

明張文忠公全集

和16
1.070
1



和1016
編1070
卷

16

明張文忠

公全集

光緒二十六年...

光緒二十七年經藤碧樹山館重刊

欽定四庫全書

欽定四庫全書提要

集部

別集類

太岳集四十六卷

浙江巡撫探進本

明治二十一年十一月八日

黃紹竑氏寄贈

明張居正撰居正有書經直解已著錄神宗初年居正獨持國柄後毀譽不一迄無定評要其振作有為之功與威福自擅之罪俱不能相掩至文章本非所長集中奏疏啟劄最多皆在廟堂時論事之作往往縱筆而成未嘗有所鍛鍊也

朱宮育祖琳錄出

表海錄略是冬皆齊鳳宮相館事之并

與鳳詠自誌之製竹不第時雖在

歐村園所製更不一談取稍要其

更取五書賦五言書珠前賦口

大活製四十六卷

卷之二十一 八

明史本傳

張居正字叔大江陵人少穎敏絕倫十五為諸生巡撫顧璘奇其文曰國器也未幾居正舉於鄉璘解犀帶以贈且曰君異日當腰玉犀不足溷子嘉靖二十六年居正成進士改庶吉士日討求國家典故徐階輩皆器重之授編修請急歸亡何還職居正為人頎面秀眉目鬚長至腹勇敢任事豪傑自許然沈深有城府莫能測也嚴嵩為首輔忌階善階者皆避匿居正自如嵩亦器居正遷右中允領國子司業事與祭酒高拱善相期以相業尋還理坊事遷侍裕邸講讀王甚賢之邸中中官亦無不善居正者而李芳數從問書義頗及天下

張文忠公全集
事尋遷右諭德兼侍讀進侍講學士領院事階代嵩首輔傾
心委居正世宗崩階草遺詔引與共謀尋遷禮部右侍郎兼
翰林院學士月餘與裕邸故講官陳以勤俱入閣而居正爲
吏部左侍郎兼東閣大學士尋充世宗實錄總裁進禮部尙
書兼武英殿大學士加少保兼太子太保去學士五品僅歲
餘時徐階以宿老居首輔與李春芳皆折節禮士居正最後
入獨引相體倨見九卿無所延納間出一語輒中肯人是以
嚴憚之重於他相高拱以很躁被論去徐階亦去春芳爲首
輔亡何趙貞吉入易視居正居正與故所善掌司禮者李芳
謀召用拱俾領吏部以扼貞吉而奪春芳政拱至益與居正

善春芳尋引去以勤亦自引而貞吉殷士儻皆爲所構罷獨
居正與拱在兩人益相密拱主封俺答居正亦贊之授王崇
古等以方略加柱國太子太傅六年滿加太傅吏部尙書建
極殿大學士以遼東戰功加太子太師和市成加少師餘如
故初徐階旣去令三子事居正謹而拱銜階甚喉言路追論
不已階諸子多坐罪居正從容爲拱言拱稍心動而拱客構
居正納階子三萬金拱以誚居正居正色變指天誓辭甚苦
拱謝不審兩人交遂離拱又與居正所善中人馮保郅穆宗
不豫居正與保密處分後事引保爲內助而拱欲去保神宗
卽位保以兩宮詔旨逐拱事具拱傳居正遂代拱爲首輔帝

引文忠公全集
御平臺召居正獎諭之賜金幣及繡蟒斗牛服自是賜賚無
虛日帝虛已委居正居正亦慨然以天下爲己任中外想望
丰采居正勸帝遵守祖宗舊制不必紛更至講學親賢愛民
節用皆急務帝稱善大計廷臣斥諸不職及附麗拱者復具
詔召羣臣廷飭之百僚皆惕息帝當尊崇兩宮故事皇后與
天子生母並稱皇太后而徽號有別保欲媚帝生母李貴妃
風居正以並尊居正不敢違議尊皇后曰仁聖皇太后皇貴
妃曰慈聖皇太后兩宮遂無別慈聖徙乾清宮撫視帝內任
保而大柄悉以委居正居正爲政以尊主權課吏職信賞罰
一號令爲主雖萬里外朝下而夕奉行黔國公沐朝弼數犯

法當逮朝議難之居正擢用其子馳使縛之不敢動既至請
貸其死錮之南京漕河通居正以歲賦逾春發水橫溢非決
則涸乃采漕臣議督艘卒以孟冬月兌運及歲初畢發少罹
水患行之久太倉粟充盈可支十年互市饒馬乃減太僕種
馬而令民以價納太僕金亦積四百餘萬又爲考成法以責
吏治初部院覆奏行撫按勘者嘗稽不報居正令以大小緩
急爲限誤者抵罪自是一切不敢飾非政體爲肅南京小奄
醉辱給事中言者請究治居正謫其尤激者趙參魯於外以
悅保而徐說保裁抑其黨毋與六部事其奉使者時令緹騎
陰誦之其黨以是怨居正而心不附保居正以御史在外往

張文忠公全集
往凌撫臣痛欲折之一事小不合詬責隨下又勅其長加考察給事中余懋學請行寬大之政居正以爲風已削其職御史傅應楨繼言之尤切下詔獄杖戍給事中徐貞明等羣擁入獄視具橐餽亦逮謫外御史劉臺按遼東誤奏捷居正方引故事繩督之臺抗章論居正專恣不法居正怒甚帝爲下臺詔獄命杖百遠戍居正陽具疏救之僅奪其職已卒戍臺由是諸給事御史益畏居正而心不平當是時太后以帝冲年尊禮居正甚至同列呂調陽莫敢異同及吏部左侍郎張四維入恂恂若屬吏不敢以僚自處居正喜建豎能以智數馭下人多樂爲之盡俺答款塞久不爲害獨小王子部眾十

餘萬東北直遼左以不獲通互市數入寇居正用李成梁鎮遼戚繼光鎮薊門成梁力戰卻敵功多至封伯而繼光守備甚設居正皆右之邊境晏然兩廣督撫殷正茂凌雲翼等亦數破賊有功浙江兵民再作亂用張佳允往撫卽定故世稱居正知人然持法嚴覈驛遞省冗官清庠序多所澄汰公卿羣吏不得乘傳與商旅無別郎署以缺少需次者輒不得補大邑士子額隘艱於進取亦多怨之者時承平久羣盜蠲起至入城市劫府庫有司恆諱之居正嚴其禁匿弗舉者雖循吏必黜得盜卽斬決有司莫敢飾情盜邊海錢米盈數例皆斬然往往長繫或瘐死居正獨亟斬之而追捕其家屬盜賊

爲衰止而奉行不便者相率爲怨言居正不恤也慈聖太后將還慈甯宮論居正謂我不能視皇帝朝夕恐不若前者之向學勤政有累先帝付託先生有師保之責與諸臣異其爲我朝夕納誨以輔台德用終先帝憑几之誼因賜坐蟒白金綵幣未幾丁父憂帝遣司禮中官慰問視粥藥止哭絡繹道路三宮賻贈甚厚戶部侍郎李幼孜欲媚居正倡奪情議居正惑之馮保亦固留居正諸翰林王錫爵張位趙志皋吳中行趙用賢習孔教沈懋學輩皆以爲不可弗聽吏部尙書張瀚以持慰留旨被逐去御史曾士楚給事中陳三謨等遂交章請留中行用賢及員外郎艾穆主事沈思孝進士鄒元標

相繼爭之皆坐廷杖謫斥有差時彗星從東南方起長互天人情洶洶指目居正至懸謗書通衢帝詔諭羣臣再及者誅無赦謗乃已於是使居正子編修嗣修與司禮太監魏朝馳傳往代司喪禮部主事曹誥治祭工部主事徐應聘治喪居正請無造朝以青衣素服角帶入閣治政侍經筵講讀又請辭歲俸帝許之及帝舉大婚禮居正吉服從事給事中李涑言其非禮居正怒出爲僉事時帝顧居正益重常賜居正札稱元輔張少師先生待以師禮居正乞歸葬父帝使尙寶少卿鄭欽錦衣指揮史繼書護歸期三月葬畢卽上道仍命撫按諸臣先期馳賜璽書敦諭範帝賚忠良銀印以賜之如楊

張文忠公全集 卷之五
五
士奇張孚敬例得密封言事戒次輔呂調陽等有大事毋得專決馳驛之江陵聽張先生處分居正請廣內閣員詔卽令居正推居正因推禮部尙書馬自强吏部右侍郎申時行入閣自强素迂居正不自意得之頗德居正而時行與四維皆自昵於居正居正乃安意去帝及兩宮賜賚慰諭有加禮遣司禮太監張宏供張儀郊外百僚班送所過地有司飭廚傳治道路遼東奏大捷帝復歸功居正使使馳諭俾定爵賞居正爲條列以聞調陽益內慚堅臥累疏乞休不出居正言母老不能冒炎暑請俟清涼上道於是內閣兩都部院寺卿給事御史俱上章請趣居正亟還朝帝遣錦衣指揮翟汝敬馳

傳往迎計日以後而令中官護太夫人以秋日由水道行居正所過守臣率長跪撫按大吏越界迎送身爲前驅道經襄陽襄王出候要居正宴故事雖公侯謁王執臣禮居正具賓主而出過南陽唐王亦如之抵郊外詔遣司禮太監何進宴勞兩宮亦各遣大璫李琦李用宣諭賜八寶金釘川扇御膳餅果醪醴百僚復班迎入朝帝慰勞懇篤予假十日而後入閣仍賜白金彩幣寶鈔羊酒因引見兩宮及秋魏朝奉居正母行儀從煊赫觀者如堵比至帝與兩宮復賜賚加等慰諭居正母子幾用家人禮時帝漸備六宮太倉銀錢多所宣進居正乃因戶部進御覽數目陳之謂每歲入額不敵所出請

明史本傳
帝置坐隅時省覽量入爲出罷節浮費疏上畱中帝復令工部鑄錢給用居正以利不勝費止之言官請停蘇松織造不聽居正爲面請得損大半復請停修武英殿工及裁外戚遷官恩數帝多曲從之帝御文華殿居正侍講讀畢以給事中上所上災傷疏聞因請振復言上愛民如子而在外諸司營私背公剝民間上宜痛鉗以法而皇上加意樽節於宮中一切用度服御賞賚布施裁省禁止帝首肯之有所蠲貸居正以江南貴豪怙勢及諸姦猾吏民善通賦選大吏精悍者嚴行督責賦以時輸國藏日益充而豪猾率怨居正居正服將除帝召吏部問期日勅賜白玉帶大紅坐蟒盤蟒御平臺召對

慰諭久之使中官張宏引見慈慶慈甯兩宮皆有恩賚而慈聖皇太后加賜御膳九品使宏侍宴帝初卽位馮保朝夕視起居擁護提抱有力小扞格卽以聞慈聖慈聖訓帝嚴每切責之且曰使張先生聞奈何於是帝甚憚居正及帝漸長心厭之乾清小璫孫海客用等導上遊戲皆愛幸慈聖使保捕海用杖而逐之居正復條其黨罪惡請斥逐而令司禮及諸內侍自陳上裁去畱因勸帝戒遊宴以重起居專精神以廣聖嗣節賞賚以省浮費卻珍玩以端好尙親萬幾以明庶政勤講學以資治理帝迫於太后不得已皆報可而心頗賺保居正矣帝初政居正嘗纂古治亂事百餘條繪圖以俗語解

之使帝易曉至是復屬儒臣紀太祖列聖寶訓實錄分類成書凡四十日創業艱難日勵精圖治日勤學日敬天日法祖日保民日謹祭祀日崇孝敬日端好尚日慎起居日戒遊佚日正宮闈日教儲貳日睦宗藩日親賢臣日去姦邪日納諫日理財日守法日儆戒日務實日正紀綱日審官日久任日重守令日馭近習日待外戚日重農桑日興教化日明賞罰日信詔令日謹名分日裁貢獻日慎賞賚日敦節儉日慎刑獄日褒功德日屏異端日飭武備日御戎狄其辭多警切請以經筵之暇進講又請立起居注紀帝言動與朝內外事日用翰林官四員入直應制詩文及備顧問帝皆優詔報許居

正自奪情後益偏恣其所黜陟多由愛憎左右用事之人多通賄賂馮保客徐爵擢用至錦衣衛指揮同知署南鎮撫居正三子皆登上第蒼頭游七人賞爲官勲戚文武之臣多與往還通姻好七具衣冠報謁列於士大夫世以此益惡之亡何居正病帝頻頒勅諭問疾大出金帛爲醫藥資四閱月不愈百官並齋醮爲祈禱南都秦晉楚豫諸大吏亡不建醮帝令四維等理閣中細務大事卽家令居正平章居正始自力後憊甚不能徧閱然尙不使四維等參之及病革乞歸上復優詔慰畱稱太師張太岳先生居正度不起薦前禮部尙書潘晟及尙書梁夢龍侍郎余有丁許國陳經邦已復薦尙書

張文忠公全集
徐學謨曾省吾張學顏侍郎王篆等可大用帝爲黏御屏晟
馮保所受書者也強居正薦之時居正已昏甚不能自主矣
及卒帝爲輟朝諭祭九壇視國公兼師傅者居正先以六載
滿加特進中極殿大學士以九載滿加賜坐蟒衣進左柱國
蔭一子尙寶丞以大婚加歲祿百石錄子錦衣千戶爲指揮
僉事以十二載滿加太傅以遼東大捷進太師益歲祿二百
石子由指揮僉事進同知至是贈上柱國謚文忠命四品京
卿錦衣堂上官司禮太監護喪歸葬於是四維始爲政而與
居正所薦引王篆曾省吾等交惡初帝所幸中官張誠見惡
馮保斥於外帝使密調保及居正至是誠復入悉以兩人交

結恣橫狀聞且謂其寶藏踰天府帝心動左右亦浸言保過
惡而四維門人御史李植極論徐爵與保挾詐通姦諸罪帝
執保禁中逮爵詔獄謫保奉御居南京盡籍其家金銀珠寶
鉅萬計帝疑居正多蓄益心豔之言官劾篆省吾并劾居正
篆省吾俱得罪新進者益務攻居正詔奪上柱國太師再奪
謚居正諸所引用者斥削殆盡召還中行用賢等遷官有差
劉臺贈官還其產御史羊可立復追論居正罪指居正構遼
庶人憲熾獄庶人妃因上疏辯寃且曰庶人金寶萬計悉入
居正帝命司禮張誠及侍郎邱樞偕錦衣指揮給事中籍居
正家誠等將至荊州守令先期錄人口錮其門子女多避避

空室中比門啟餓死者十餘輩誠等盡發其諸子兄弟藏得黃金萬兩白金十餘萬兩其長子禮部主事敬修不勝刑自誣服寄三十萬金於省吾篆及傅作舟等尋自縊死事聞時行等與六卿大臣合疏請少緩之刑部尚書潘季馴疏尤激楚詔畱空宅一所田十頃贍其母而御史丁此呂復追論科場事謂高啟愚以舜禹命題爲居正策禪受尙書楊巍等與相駁此呂出外啟愚削籍後言者復攻居正不已詔盡削居正官秩奪前所賜璽書四代誥命以罪狀示天下謂當剖棺戮屍而姑免之其弟都指揮居易子編修嗣修俱發戍烟瘴地終萬厯世無敢白居正者熹宗時廷臣稍稍追述之而鄒

元標爲都御史亦稱居正詔復故官子葬祭崇禎三年禮部侍郎羅喻義等訟居正冤帝令部議復二廕及誥命十三年敬修孫同敞請復武廕併復敬修官帝授同敞中書舍人而下部議敬修事尙書李日宣等言故輔居正受遺輔政事皇祖者十年肩勞任怨舉廢飭弛弼成萬厯初年之治其時中外又安海內殷阜紀綱法度莫不修明功在社稷日久論定人益追思帝可其奏復敬修官同敞負志節感帝恩益自奮十五年奉勅慰問湖廣諸王因令調兵雲南未復命兩京相繼失走詣福建唐王亦念居正功復其錦衣世廕授同敞指揮僉事尋奉使湖南聞汀州破依何騰蛟於武崗永明王用

張文忠公全集
延臣薦改授同做侍讀學士爲總兵官劉承蔭所惡言翰林
吏部督學必用甲科乃改同做尙寶卿以大學士瞿式耜薦
擢兵部右侍郎兼翰林侍讀學士總督諸路軍務同做有文
武材意氣慷慨每出師輒躍馬爲諸將先或敗奔同做危坐
不去諸將復還戰或取勝軍中以是服同做大將王永祚等
久圍永州
大兵赴救胡一青率眾迎敵戰敗同做馳至全州檄楊國棟
兵策應乃解去

順治七年大兵破嚴關諸將盡棄桂林走城中虛無人獨式
耜端坐府中適同做自靈川至見式耜式耜曰我爲畱守當
死此子無城守責盍去諸同做正色曰昔人恥獨爲君子公
顧不許同做共死乎式耜喜取酒與飲明燭達旦侵晨被執
諭之降不從令爲僧亦不從乃幽之民舍雖異室聲息相聞
兩人日賦詩倡和閱四十餘日整衣冠就刃顏色不變旣死
同做屍植立首墜躍而前者三人皆辟易而居正第五子允
修字建初廕尙寶丞崇禎十七年正月張獻忠掠荊州允修
題詩於壁不食而死

張文忠公遺像



張文忠公遺像

眼皆欲墜不食而死

對字張文忠公遺像

兩人日相持得勝四十餘日

不勝則死

不勝則死

不勝則死

不勝則死

張文忠公全集



重刻述例

一 謹案

四庫全書提要太岳集四十六卷今所據明刻本四十六卷當是提要所採本吾邑鄧氏繙明本增行實一卷為四十七卷安化陶文毅刻於吳門復增原序一卷為四十八卷茲刻雖經重編卷數仍依明本惟併行實原序為一卷別輯增錄為一卷都四十八卷

一 原編首詩次文次書牘奏疏茲刻以奏疏為一集書牘次之文集詩集又次之女誠直解又次之以公之勳業著在奏疏書牘詩文乃其餘事而女誠直解本自為

書不必屢入文集也至帝鑑圖說四書直解書經直解各部俟此刻工竣仍當次第付梓以成全書

一明刻陶刻均署張太岳文集鄉國先賢易名之典著在史策似應稱謚署集為宜謹僭署明張文忠公全集想亦論古者所許也

一原刻每類之中編次殊未畫一茲刻前後略有移掇各從其類取便檢尋極知僭妄閱者諒之

一茲刻初據鄧刻為底本開雕過半迺得明刻同邑陳廉克焜陶刻才經晨家藏本據為校勘三本均有訛誤其有他書可證灼然易知者徑行改定至若名稱互異

如北川白川百川南明南溟懷川懷洲鳳渚鳳翥萊山來山之類字句脫誤如朕方取河則并但兩之類無從參驗者一仍其初襲謬沿訛誠所不免海內方雅幸糾正之

一公立朝本末略具斯編身後公論散見於各家文集者尤班班可攷茲併蒐入附錄用闡幽光嗣有所知當補綴焉

一茲刻倡於奭召南觀察良指廉籌款發凡起例授楨使董校刻復得俞君實觀察鍾穎之存款陳復心觀察

兆葵舒暢亭太守惠之撥款近又蒙濮紫泉觀察子潼慨分清俸始克竣工至商推審訂則復州張紀廷振綱

山陰劉海門瀚兩君始終其事焉楨以衰病躬任讎校

未能精審舛譌滋多良深內疚耳

光緒二十有七年辛丑八月邑人田楨尊父謹述



明張文忠公全集一目錄

奏疏一

陳六事疏

請冊立東宮疏

請宥言官以彰聖德疏

請停取銀兩疏

請宥言官疏

再乞酌議大閱典禮以明治體疏

請皇太子出閣講學疏

奏疏二

謝召見疏

兩宮尊號議

謝賜玉帶疏

看詳禮部議兩宮尊號疏

請諭戒邊臣疏

遵諭自陳不職疏

請戒諭羣臣疏

乞崇聖學以隆聖治疏

請酌定朝講日期疏

擬日講儀注疏

辭免恩命疏

再辭恩命疏

三辭恩命疏

四辭恩命疏

謝賜勅獎賞疏

山陵禮成奉慰疏

纂修事宜疏

謝賜貂鼠疏

辭免筵宴疏

議處黔國公沐朝弼疏

謝御筆大書疏

再謝御書疏

奏疏三

進帝鑑圖說疏

帝鑑圖說述語 附

謝銀幣疏

明制體以重王言疏

請開經筵疏

廣東奏捷辭免加恩疏

謝堂樓額名并賜金疏

請稽查章奏隨事考成以修實政疏

考滿謝賚銀幣疏

考滿辭加恩疏

進講章疏

請定面獎廉能儀注疏

謝御筆大書疏

謝恩賚父母疏

謝宸翰疏

進寶錄辭免加恩疏

再辭恩命疏

遼東大捷辭恩疏

謝御劄獎勵疏

進職官書屏疏

奏疏四

議處史職疏

請裁抑外戚疏

請申舊章飭學政以振興人才疏

論邊事疏

進郊禮圖考疏

郊禮新舊考附

被言乞休疏

謝恩疏

乞宥言官疏

奉諭看詳民本疏

奏疏五

請重修大明會典疏

進世宗御筆疏

請擇有司蠲逋賦以安民生疏

考滿辭免恩命疏

考滿謝手勅加恩疏

再辭恩命疏

三辭恩命疏

請敘錄日講諸臣疏

辭加恩疏

議處就教舉人疏

請停止內工疏

橫西大捷辭免加恩疏

奏請聖母裁定大婚吉期疏

纂修書成辭恩命疏

請決重囚疏

奏疏六

聞慶謝降諭宣慰疏

謝遣官賜賻疏

謝兩宮太后賜賻疏

謝卹典疏

乞恩守制疏

再乞守制疏

謝賜甜食疏

三乞守制疏

謝降諭慰留疏

乞暫遵諭旨辭俸守制預允歸葬疏

謝賜點心甜食疏二首

乞恢聖度宥愚蒙以全國體疏

謝召見疏

謝內府供給疏

謝免自陳疏

請別遣大臣以重大禮疏

謝皇太后慈諭疏

乞遵守慈諭疏

奏疏七

遼東大捷辭免加恩疏

辭上巾恩賞疏

再辭遼東大捷加恩疏

乞歸葬疏

大婚禮成辭免加恩疏

再乞歸葬疏

謝准假歸葬疏

請簡用閣臣疏

奉旨薦舉閣臣疏

請給勘合疏

謝賜勅諭并銀記疏

謝兩宮賜路費疏

召辭紀事

謝召見面辭疏

謝遣官郊餞疏

歸葬事畢謝恩疏

請寬限疏

奉諭擬遼東賞功疏

奉諭還朝疏

謝遣官郊迎疏

謝兩宮遣使郊勞疏

謝召見疏

奏疏八

乞鑒別忠邪以定國是疏

奉旨迎母就養謝遣官郊勞疏

謝兩宮聖母疏

謝賜母首飾等物疏

謝兩宮聖母疏

為故大學士高拱乞恩疏

請裁定宗藩事例疏

張文忠公全集
番夷求貢疏

召見紀事

請更定時享祝文疏

看詳戶部進呈揭帖疏

論外戚封爵疏

請停止輸錢內庫供賞疏

奏疏九

請罷織造內臣對

請酌減增造段疋疏

服闋謝降勅召見賜衣帶金器疏

召見平臺記事

辭免恩命疏

再辭恩命疏

辭考滿加恩疏

歸政乞休疏

再乞休致疏

謝聖諭疏

請專官纂修疏

請處治邪佞內臣疏

請清汰近習疏

請敷陳謨烈以裨聖學疏
請停止工程疏

奏疏十

請用翰林官更番侍直疏

議外戚子弟恩蔭疏

文華殿論奏

患病謝遣醫并乞假調理疏

謝賜粥米食品疏

謝聖諭存問并賜銀兩等物疏

謝遣中使趣召并賜銀八寶等物疏

奏疏十一

考滿謝手勅賜賚疏

考滿謝恩命疏

再辭恩命疏

奉諭整肅朝儀疏

請蠲積逋以安民生疏

進大閱圖頌卷疏

給假治疾疏

請乞優禮耆碩以光聖治疏

給假謝恩疏

恭謝賜問疏

乞骸歸里疏

恭謝手勅疏

再懇生還疏

送起居館講大寶箴記事

送起居館論邊情記事

奏疏十二

論時政疏

代謝賜御製答輔臣賀雪吟疏

遵詔自陳不職疏

辭免恩命疏

賀瑞雪表

代徐相公賀瑞雪表

紫極殿成賀表

紫宸宮賀表

賀瑞穀表 二首

賀瑞鹿表

賀瑞兔表

聖壽節賀表 六首

奏疏十三

張文忠公全集
六事開款上請用備聖明採擇臣又自惟幸得以經術遭逢
聖主備位輔弼朝夕與同事諸臣寅恭諧協凡有所見自可
隨事納忠似不必更有建白但臣之愚昧竊見皇上有必爲
之志而淵衷靜默臣下莫能仰窺天下有願治之心而舊習
因仍趨向未知所適故敢不避形迹披瀝上陳期於宣昭主
德而齊一衆志非有他也伏乞聖慈垂鑒俯賜施行天下幸
甚臣愚幸甚

計開

一省議論臣聞天下之事慮之貴詳行之貴力謀在於衆斷
在於獨漢臣申公云爲治不在多言願力行何如耳臣竊見
頃年以來朝廷之間議論太多或一事而甲可乙否或一人
而朝由暮跖或前後不覺背馳或毀譽自爲矛盾是非淆於
唇吻用舍決於愛憎政多紛更事無統紀又每見督撫等官
初到地方卽例有條陳一疏或漫言數事或更置數官文藻
競工覽者每爲所眩不曰此人有才卽曰此人任事其實蒞
任之始地方利病豈盡周知屬官賢否豈能洞察不過採聽
於衆口耳讀其詞藻雖若爛然究其指歸茫未有效比其久
也或并其自言者而忘之矣卽如昨年皇上以虜賊內犯特
勅廷臣集議防虜之策當其時衆言盈庭羣策畢舉今又將
一年矣其所言者果盡舉行否乎其所行者果有實效否乎

又如薊鎮之事初建議者曰吾欲云云當事者亦曰吾欲云云曾無幾何而將不相能士譁於伍異論繁興訛言踵至於議罷練兵者又紛紛矣臣竊以爲事無全利亦無全害人有所長亦有所短要在權利害之多寡酌長短之所宜委任責成庶克有濟今始則計慮未詳既以人言而遽行終則執守靡定又以人言而遽止加之愛惡交攻意見橫出讒言微中飛語流傳尋之莫究其端聽者不勝其眩是以人懷疑貳動見講張虛曠歲時成功難睹語曰多指亂視多言亂聽此最當今大患也伏望皇上自今以後勵精治理主宰化機掃無用之虛詞求躬行之實效欲爲一事須審之於初務求停

當及計慮已審卽斷而行之如唐憲宗之討淮蔡雖百方阻之而終不爲之搖欲用一人須慎之於始務求相應旣得其人則信而任之如魏文侯之用樂羊雖謗書盈篋而終不爲之動再乞天語丁甯部院等衙門今後各宜仰體朝廷省事尙實之意一切章奏務從簡切是非可否明白直陳毋得彼此推諉徒託空言其大小臣工亦各宜秉公持正以誠心直道相與以勉修職業爲務反薄歸厚尙質省文庶治理可興而風俗可變也伏乞聖裁

一振紀綱臣聞人主以一身而居乎兆民之上臨制四海之廣所以能使天下皆服從其教令整齊而不亂者紀綱而已

綱如網之有繩紀如絲之有總詩曰勉勉我王綱紀四方此
人主太阿之柄不可一日而倒持者也臣竊見近年以來紀
綱不肅法度不行上下務爲姑息百事悉從委徇以模稜兩
可謂之調停以委曲遷就謂之善處法之所加唯在於微賤
而強梗者雖壞法干紀而莫之誰何禮之所制反在於朝廷
而爲下者或越理犯分而恬不知畏陵替之風漸成指臂之
勢難使賈誼所謂蹶盪者深可慮也然人情習玩已久驟一
振之必將曰此拂人之情者也又將曰此務爲操切者也臣
請有以解之夫徇情之與順情名雖同而實則異振作之與
操切事若近而用則殊蓋順情者因人情之所同欲者而施

之大學所謂民之所好好之民之所惡惡之者也若徇情則
不顧理之是非事之可否而惟人情之是便而已振作者謂
整齊嚴肅懸法以示民而使之不敢犯孔子所謂道之以德
齊之以禮者也若操切則爲嚴刑峻法虐使其民而已故情
可順而不可徇法宜嚴而不宜猛伏望皇上奮乾剛之斷普
離照之明張法紀以肅羣工攬權綱而貞百度刑賞予奪一
歸之公道而不必曲徇乎私情政教號令必斷於宸衷而毋
致紛更於浮議法所當加雖貴近不宥事有所枉雖疏賤必
申仍乞勅下都察院查照嘉靖初年所定憲綱事理再加申
飭秉持公論振揚風紀以佐皇上明作勵精之治庶體統正

朝廷尊而下有法守矣伏乞聖裁
一重詔令臣聞君者主令者也臣者行君之令而致之民者也君不主令則無威臣不行君之令而致之民則無法斯大亂之道也臣看得舊規凡各衙門章奏奉旨有某部看了來說者必是緊關事情重大機務有某部知道者雖若稍緩亦必合行事務或關係各地方民情利病該衙門自宜參酌緩急次第題覆至於發自聖衷特降勅諭者又與泛常不同尤宜上緊奉行事乃無壅蓋天子之號令譬之風霆若風不能動而霆不能擊則造化之機滯而乾坤之用息矣臣竊見近日以來朝廷詔旨多廢格不行鈔到各部概從停閣或已題

奉欽依一切視爲故紙禁之不止令之不從至於應勘應報奉旨行下者各地方官尤屬遲慢有查勘一事而十數年不完者文卷委積多致沉埋干證之人半在鬼錄年月既遠事多失真遂使漏網終逃國有不伸之法覆盆自苦人懷不白之冤是非何由而明賞罰何由而當伏望勅下部院等衙門凡大小事務既奉明旨須數日之內卽行題覆若事理了然明白易見者卽宜據理剖斷毋但諉之撫按議處以致耽延其有合行議勘問奏者亦要酌量事情緩急道里遠近嚴立限期責令上緊奏報該部置立號簿登記註銷如有違限不行奏報者從實查參坐以違制之罪吏部卽以此考其勤惰

以爲賢否然後人思盡職而事無壅滯也伏乞聖裁
一覈名實臣聞人主之所以馭其臣者賞罰用舍而已欲用
舍賞罰之當在於綜覈名實而已臣每見朝廷欲用一人當
事者輒有乏才之歎竊以爲古今人才不甚相遠人主操用
舍予奪之權以奔走天下之士何求而不得而曰世無才焉
臣不信也惟名實之不覈揀擇之不精所用非其所急所取
非其所求則上之爵賞不重而人懷僥倖之心牛驥以並駕
而俱疲工拙以混吹而莫辨才惡得而不乏事惡得而有濟
哉臣請略言其概夫器必試而後知其利鈍馬必駕而後知
其篤良今用人則不然稱人之才不必試之以事任之以事

不必更考其成及至僨事之時又未必明正其罪惟魯少文
者以無用見譏而大言無當者以虛聲竊譽倜儻伉直者以
忤時難合而脂韋逢迎者以巧宦易容其才雖可用也或以
卑微而輕忽之其才本無取也或以名高而尊禮之或因一
事之善而終身借之以爲資或以一動之差而眾口訾之以
爲病加以官不久任事不責成更調太繁遷轉太驟資格太
拘即或譽失實且近來又有一種風尚士大夫務爲聲稱舍其
職業而出位是思建白條陳連編累牘至覈其本等職業反
屬茫昧主錢穀者不對出納之數司刑名者未諳律例之文
官守既失事何由舉凡此皆所謂名與實爽者也如此則真

才實能之士何由得進而百官有司之職何由得舉哉故臣
妄以爲世不患無才患無用之道如得其道則舉天下之
士唯上之所欲爲無不應者臣願皇上慎重名器愛惜爵賞
用人必考其終授任必求其當有功於國家卽千金之賞通
侯之印亦不宜吝無功國家雖嘖笑之微敝袴之賤亦勿輕
予仍乞勅下吏部嚴考課之法審名實之歸遵照祖宗舊制
凡京官及外官三六年考滿母得概引復職濫給恩典須明
白開具稱職平常不稱職以爲殿最若其功過未大顯著未
可遽行黜陟者乞將誥勅勳階等項酌量裁與稍加差等以
示激勸至於用舍進退一以功實爲準母徒眩於聲名母盡

拘於資格母搖之以毀譽母雜之以愛憎母以一事概其平
生母以一肯掩其大節在京各衙門佐貳官須量其才器之
所宜者授之平居則使之講究職業贊佐長官如長官有缺
卽以佐貳代之不必另索其屬官有諳練故事盡心官守者
九年任滿亦照吏部陞授京職高者卽轉本衙門堂上官小
九卿堂官品級相同者不必更相調用各處巡撫官果於地
方相宜久者或就彼加秩不必又遷他省布按二司官如參
議久者卽可陞參政僉事久者卽可陞副使不必互轉數易
以滋勞擾如此則人有專職事可責成而人才亦不患其缺
乏矣此外如臣言有未盡者亦乞勅下該部悉心講求條列

具奏伏乞聖裁
一固邦本臣聞帝王之治欲攘外者必先安內書曰民爲邦本本固邦甯自古雖極治之時不能無夷狄盜賊之患唯百姓安樂家給人足則雖有外患而邦本深固自可無虞唯是百姓愁苦思亂民不聊生然後夷狄盜賊乘之而起蓋安民可與行義而危民易與爲非其勢然也恭惟皇上嗣登大寶首下蠲卹之詔黎元忻忻方切更生獨昨歲以元年蠲賦一半國用不足又邊費重大內帑空乏不得已差四御史分道督賦三都御史清理屯鹽皆一時權宜以佐國用之急而人遂有苦其搜括者臣近日訪之外論皆稱不便緣各御史差

出目觀百姓窮苦亦無別法清查止將官庫所儲盡行催解以致各省庫藏空虛水旱災傷視民之死而不能賑兩廣用兵供餉百出而不能支是國用未充而元氣已耗矣臣竊以爲天之生財在官在民止有此數譬之於人稟賦強弱自有定分善養生者唯樽節愛惜不以嗜欲戕之亦皆足以卻病而延壽昔漢昭帝承武帝多事之後海內虛耗霍光佐之節儉省用與民休息行之數年百姓阜安國用遂足然則與其設法征求索之於有限之數以病民孰若加意省儉取之於自足之中以厚下乎仰惟皇上卽位以來凡諸齋醮土木淫侈之費悉行停革雖大禹之克勤克儉不是過矣然臣竊以

爲矯枉者必過其正當民窮財盡之時若不痛加省節恐不能救也伏望皇上軫念民窮加惠邦本於凡不急工程無益徵辦一切停免敦尚儉素以爲天下先仍乞勅下吏部慎選良吏牧養小民其守令賢否殿最惟以守已端潔實心愛民乃與上考稱職不次擢用若但善事上官幹理簿書而無實政及於百姓者雖有才能幹局止與中考其貪污顯著者嚴限追贓押發各邊自行輸納完日發遣發落不但懲貪亦可以爲實邊之一助再乞勅下戶部悉心講求財用之所以日匱者其弊何在今欲措理其道何由今風俗侈靡官民服舍俱無限制外之豪強兼并賦役不均花分詭寄恃頑不納田

糧偏累小民內之官府造作侵欺冒破奸徒罔利有名無實各衙門在官錢糧漫無稽查假公濟私官吏滋弊凡此皆耗財病民之大者若求其害財者而去之則亦何必索之於窮困之民以自耗國家之元氣乎前項催督御史事完之後宜卽令回京此後不必再差重爲地方之病其屯鹽各差都御史應否取回別用但責成於該管撫按使之悉心清理亦乞勅下該部從長計議具奏定奪以後上下唯務清心省事安靜不擾庶民生可遂而邦本獲甯也伏乞聖裁

一飭武備臣惟當今之事其可慮者莫重於邊防廟堂之上所當日夜圖畫者亦莫急於邊防邇年以來虜患日深邊事

張文忠公全集
久廢比者屢蒙聖諭嚴飭邊臣心思奮一時督撫將領等
官頗稱得人目前守禦似亦略備矣然臣以爲虜如禽獸然
不一創之其患不止但戰乃危事未可易言須從容審圖以
計勝之耳今之上策莫如自治而其機要所在惟在皇上赫
然奮發先定聖志聖志定而懷忠蘊謀之士得效於前矣今
譚者皆曰吾兵不多食不足將帥不得其人臣以爲此三者
皆不足患也夫兵不患少而患弱今軍伍雖缺而糧籍具存
若能按籍徵求清查影占隨宜募補著實訓練何患無兵捐
無用不急之費併其財力以撫養戰鬪之士何患無財懸重
賞以勸有功寬文法以伸將權則忠勇之夫孰不思奮又何

患於無將臣之所患獨患中國無奮勵激發之志因循怠玩
姑務偷安則雖有兵食良將亦恐不能有爲耳故臣願皇上
急先自治之圖堅定必爲之志屬任謀臣修舉實政不求近
功不忘有事熟計而審行之不出五年虜可圖矣至於目前
自守之策莫要於選擇邊吏團練鄉兵併守墩堡令民收保
時簡精銳出其空虛以制之虜卽入犯亦可不至大失此數
者昨雖已經閣部議行臣愚猶恐人心玩愒日久尙以虛文
塞責伏乞勅下兵部申飭各邊督撫務將邊事著實舉行俟
秋防畢日嚴查有無實效大行賞罰庶沿邊諸郡在在有備
而虜不敢窺也再照祖宗時京營之兵數十萬今雖不足尙

可得八九萬人若使訓練有方亦豈盡皆無用但士習驕惰法令難行雖春秋操練徒具文耳臣考之古禮及我祖宗故事俱有大閱之禮以習武事而戒不虞今京城內外守備單弱臣常以爲憂伏乞勅下戎政大臣申嚴軍政設法訓練每歲或間歲季冬農隙之時恭請聖駕親臨校閱一以試將官之能否一以觀軍士之勇怯有技藝精熟者分別賞賚老弱不堪者卽行汰易如此不惟使輦轂之下常有數萬精兵得居重馭輕之道且此一舉動傳之遠近皆知皇上加意武備整飭戎事亦足以伐狂虜之謀銷未萌之患誠轉弱爲強之一機也伏乞聖裁奉聖旨覽卿奏俱深切時務具見謀國忠

懇該部院看議行

請冊立東宮疏

臣聞太子者國之大本君之儲貳自昔聖帝明王莫不早建元良預定儲位所以尊宗廟重社稷也臣昔侍藩邸竊聞皇子聰明岐嶷睿質夙成我皇上茂膺天眷篤生聖子中外人心咸切仰戴去歲皇上登極之初禮官卽疏請冊立伏奉聖諭以皇子年尙幼先賜名而後冊立臣有以見皇上慎重典禮之意但人心屬望已久大計亦宜早定查得我祖宗故事宣宗以宣德三年立英宗爲皇太子時年二歲憲宗以成化十一年立孝宗爲皇太子時年六歲孝宗以宏治五年立武

宗爲皇太子時尙未周歲也今皇子年已六歲比之孝廟年
適相符較之英武兩朝則已過其期矣伏望皇上率由祖宗
之舊章深惟社稷之長計以今首春吉旦勅下禮官早正儲
宮之位以定國本以慰羣情至於出閣講學及一應朝賀等
禮稍俟數年皇子睿體充實然後舉行亦未爲遲臣愚昧荷
皇上恩遇列在輔臣之末事關宗社不敢不盡其愚伏惟聖
慈俯允施行天下幸甚奉御批禮部本上允行

請宥言官以彰聖德疏

昨該吏科給事中石星疏陳時政冒犯天威伏奉御批石星
這廝惡言訕上好生無理著錦衣衛拏在午門前著實打六

十棍爲民當差不許欺縱臣一聞此旨不勝驚駭仰惟皇上
聖德寬宏天覆地載卽位以來敬大臣體羣臣矜不能赦小
過至於言官論事往往曲賜含容未嘗輕加罪責今一旦有
此處分不知石星所言何事致觸聖怒如此今日於該科取
其原本觀之乃知石星所言委爲狂妄不知事體如鼇山燈
在正月二十間已卽撤去皇上於宮中遊宴一切減省在廷
之臣方切仰戴而星乃信其誤聞輒肆誣詆至於經筵日講
已奉有欽依擇日舉行陸鳳儀差寫聖諭已奉旨處分不許
救擾而星乃啾啾焉復以爲言此其狂愚無識恣肆妄言在
星誠爲有罪而在皇上亦有不能忍受者矣但臣惓惓之愚

竊以爲科道乃朝廷耳目之官職司糾正必平日養其剛直之氣寬其觸冒之誅而後遇事敢言無所畏避四方利弊得以上聞我皇上登極之初特下明詔廣求直言故大小臣工莫不以幸際昌辰遭逢明主凡有一得之愚皆願獻於闕下今若因此一事將石星遂加重譴四方聞之必謂朝廷求言特虛文耳轉相告戒以言爲諱雖有忠謀讜論四方利病誰肯爲朝廷言者石星一人固不足惜然因此折言官之氣開忌諱之門則於聖朝從諫之盛美豈不有虧明詔求言之初意豈不相背哉且自古順耳之言易從逆耳之言難聽於逆耳難受之言而能曲容之乃爲盛德臣追思皇上昔在藩邸

臣因進講漢光武殺直臣韓歆事反覆開導言人臣進言之難歎惜光武以明聖之主不能容一韓歆書之史冊甚爲盛德之累荷蒙皇上改容傾聽又於宮中御書文武獻納四字置之坐側是皇上因臣之言有所感悟而欲廣納忠謀以追堯舜之治也今一聞直言遂爾加罪則皇上昔時所以感悟於臣言者其心爲何如哉臣又訪得石星原任行人去年十月間始選爲給事草野之人少不更事乍被選用職司言責不量淺深急於圖報故發言狂妄如此原其本心實亦無他今旣杖之於朝則妄言者已知所警乃又盡褫其職發爲編氓臣竊以爲過矣今大臣皆持祿養交莫肯盡言諫官皆

引文忠公全集
懾於天威不敢申救人臣緘默苟容恐非國家之福臣受皇
上厚恩備位輔導有股肱心膂之託誠不願皇上有此過舉
伏望聖慈哀憫狂愚曲賜寬宥將石星召還原職或謫降外
任以倡敢言之氣以開自新之門則言者之狂妄益無以解
於天下之公惡而皇上包容直臣之美宥過赦罪之仁將垂
之萬世而有光矣畱中

請停取銀兩疏

閣中公本

昨者恭睹聖諭欽取戶部銀三十萬兩隨該戶部奏稱邊費
重大國用不足欲乞聖明停止取用等因奉御批已有旨了
臣等看得祖宗朝國用邊餉俱有定額各處庫藏尚有贏餘

自嘉靖二十九年虜犯京師之後邊費日增各處添兵添馬
修堡修城年例犒賞之費比之先朝數幾百倍奏討請求殆
無虛日加以連年水旱災傷百姓徵納不前庫藏搜括已盡
臣等備查御覽揭帖計每歲所入折色錢糧及鹽課贖贖事
例等項銀兩不過二百五十餘萬而一歲支放之數乃至四
百餘萬每年尚少銀一百五十餘萬無從措處生民之骨血
已罄國用之廣出無經臣等日夜憂惶計無所出方與該部
計議設處支持目前尚恐不給若又將前項銀兩取供上用
則積貯愈虛用度愈缺一旦或有饑荒盜賊之事何以應之
該部所以懇切具奏誠事勢窮蹙有萬不得已者也仰惟皇

上嗣登大寶屢下寬卹之詔躬行節儉以先天下海內訢訢方幸更生頃者以來買辦漸多用度漸廣當此缺乏之際臣等實切隱憂輒敢不避煩瀆披瀝上請伏願皇上俯從該部之言將前項銀兩免行取進仍望念國儲之日乏懷儉德之永圖節賞賚以省財用停買辦以寬民力如上供之費有必不可已者照祖宗舊制止於內庫取用至於該部所儲專以備軍國重大之費庶國用可以漸裕而民力可以少甦也臣等無任惶悚隕越之至奉御批朕覽卿等所奏戶部銀兩缺乏內庫亦缺銀兩朕方取既這等說且取十萬來卿等傳示不必再來奏擾

請宥言官疏

公本

本月十一日臣等在閣辦事忽聞御史詹仰庇以言事忤旨命錦衣衛拏在午門前打一百棍發爲民臣等不勝驚愕緣此本未經發票不知所言何事至於觸犯聖怒如此昨於該科查問原本乃知奏內以清查內官監錢糧末後一段有再照等語詞涉狂妄致干譴責乃其自取臣等何敢黨護復行奏擾但惟朝廷設耳目之官正欲其每事匡正有所裨益卽或有所觸犯亦必曲賜含容以養其剛直之氣然後遇事直言無所畏避若譴怒重加摧折過甚將使諫臣喪氣箝口不言倘國家有大利害朝廷有大姦惡誰敢復爲皇上言者乎

且臣等再三參詳仰庇疏意止因該監錢糧未明欲行清查以資國用原其本心實亦無他若以其出言狂躁而罪之或量爲罰治亦足懲戒乃杖之於朝廷之上盡褫其官似爲少重矣比見九卿科道諸臣皆向臣等言皇止天性寬仁卽位以來敬大臣體羣臣矜不能赦小過卽一二言官有言及乘輿者亦未嘗輒加罪責乃今仰庇以指摘內監一事遂赫然震怒有此處分似非皇上平日所以優容言官之意責臣等職居輔導坐視不救臣等無以應之深切惶悚查得隆慶元年該吏科都給事中胡應嘉以建言得罪奉旨爲民隨蒙天恩矜宥改從降調至今大小臣工無不稱頌如蒙聖慈哀矜狂愚勅下吏部查照應嘉事例將仰庇量調外任或降邊方雜職令其省改圖報則我皇上天寬地容之量赦過宥罪之仁將傳之萬世而有光矣臣等又惟言路之通塞實天下治忽所關我聖祖有訓凡天下利病許諸人直言無隱所以防壅蔽而杜奸萌也伏望皇上今後凡臣下有建白條陳悉發下臣等看詳有可採者卽望嘉納施行或有妄言無當不知忌諱者亦乞俯賜包容以倡敢言之氣杜欺蔽之端庶下情無壅而治道可興也臣等無任懇切祈望之至奉御批知道了該衙門知道

再乞酌議大閱典禮以明治體疏

近該南京刑科給事中駱問禮奏稱大閱古禮非今時所急不必仰煩聖駕親臨等因緣臣於去年七月條陳六事內一款飭武備中議及前事荷蒙聖明採納允行原臣本意止以京營戎務廢弛日久緩急無備先年雖屢經言官建白該部題奉欽依釐革整飭迄今數十餘年竟無成效臣竊以爲國之大事在戎今人心懈惰如此若非假借天威親臨閱視不足以振積弱之氣而勵將士之心又自皇上御極以來如耕藉以示重農之意視學以彰崇儒之美一人大典禮皆已次第舉行則大閱之禮亦古者聖王詰兵治戎安不忘危之意且稽之列聖實錄在祖宗朝亦間有行者遂爾冒昧具奏上

請其意但欲借此以整飭戎務振揚威武而已然自臣原疏觀之此不過飭武備中之一事其惓惓納忠之意委不在此揆之當今時務委非所急今駱問禮欲乞皇上先其所急雷神萬幾以勵庶職此誠根本切要之論又謂釁端宜防巡幸宜謹尤爲計慮深遠非臣淺陋所及臣聞人臣進言於君不必其說之盡行事有至當之論不必其初之爲是況臣職忝輔導一言一動務合天下之公尤不宜拂眾論而執己見以爲是也伏乞勅下該部再加詳議如果事體未便不必另議停止夫始以爲可行而行之繼以爲當止而止之唯求以便於國家耳輔臣科臣之言何擇焉臣若不自言之該部無從

酌議輒敢冒昧瀆奏伏乞聖明俯覽愚誠不勝幸甚奉御批
該部看了來說

請皇太子出閣講學疏

公本

昨該禮部禮科題請東宮出閣講學臣等擬票擇日具儀奉
御批年十齡來奏此我皇上保愛東宮不欲以講讀勞之也
臣等敢不仰體聖心但竊聞孔子有云愛之能勿勞乎勞之
正所以成其愛也遠稽古禮近考祖制皆以八歲就學蓋人
生八歲則知識漸長情竇漸開養之以正則日就規矩養之
不正則日就放逸所關至重也故周成王在襁褓之中即周
召太公爲之師保爲之置三少爲之選天下之端士以衛翼

之自孩提有識即見正事聞正言而成王爲有周之令主良
有以也敬惟東宮殿下英明天錫睿智夙成今已八齡非襁
褓矣正聰明初發之時理欲互勝之際必及時出閣遴選孝
友敦厚之士日進仁義道德之說于以開發其智識于以薰
陶其德性庶前後左右所與處者皆正人出入起居所見聞
者皆正事作聖之基以豫養而成天下之本以早教而端也
若必待十齡去此尙有二年之遠中間倘所見所聞少有不
正則關係匪輕早一日則有一日培養之益遲一年則少一
年進修之功惟皇上深省焉臣等職叨輔導義不容默用是
不避煩瀆懇切陳請恭候命下臣等會同禮部酌議簡便儀

注上請欽定施行伏望聖明俯賜俞允隆慶四年正月二十

日上

臣等伏以聖上躬親萬幾，日昃宵衣，一曰勤養之益，一曰慎之。臣等伏以聖上躬親萬幾，日昃宵衣，一曰勤養之益，一曰慎之。臣等伏以聖上躬親萬幾，日昃宵衣，一曰勤養之益，一曰慎之。

復州張振綱總校
山陰劉瀚

明張文忠公全集一

謝召見疏

奏疏二

先該臣以祇役山陵回還中暑致病具奏請假調理本月十九日辰刻忽聞中使傳奉聖旨宣召臣入皇上御平臺命臣至寶座前親渙玉音云先生為父皇陵寢辛苦受熱又以國家事重命臣只在閣調理不必給假臣叩頭承旨訖復奉皇上親諭云凡事要先生盡心輔佐且追述先帝之言加以忠臣之獎臣感激涕零不能仰視因伏奏臣叨受先帝厚恩親承顧命敢不竭力盡忠以圖報稱方今國家要務惟在遵守祖宗舊制不必紛紛更改至於講學親賢愛民節用又君道

長文忠公全集

奏疏二

所當先者伏望聖明留意蒙皇上親答云先生說的是臣又奏目今天氣盛暑望皇上在宮中慎起居節飲食以保養聖躬茂膺萬福蒙皇上親答云知道了與先生酒飯喫隨願賜銀五十兩紗絲四表裏內蟒龍斗牛各一疋臣叩頭祇謝而出欽此臣竊惟召見輔臣迺祖宗朝盛事先帝臨御六年淵穆聽政屢經羣臣奏復俱未蒙賜允天下臣民仰望此舉殆非一日我皇上甫登寶位方在妙齡卽慨然發自淵衷修明曠典此誠上下交泰之期宗社萬年之福也而臣愚乃得首逢其盛可不謂非常大幸哉但念臣起自草茅行能無取當先帝踐阼之初卽拔寘密勿之地及龍馭上賓之日又恭承

憑几之言茲遇皇上紹統凝基更新理化自揣位高才薄方欲以不能而止而皇上迺曲憐舊物俯鑒樸愚特御內臺宣臣入見得以密邇天光親聆溫獎夫恭閱山陵臣之分也而皇上以父皇之重過憫其勞俾之在閣調理代言備問臣之職也而倉卒奏對之言皆蒙優納而禁帑駢藩之錫尤出常規以上異恩有一于此皆足爲當世希豔而臣愚一旦兼得之其何以仰答眷知副此千載一時之盛際哉臣聞古所稱爲輔弼大臣者在于贊成君德又安海內責任甚鉅固非臣愚所能稱塞上意而人臣之道必秉公爲國不恤其私乃謂之忠臣少受父師之訓于此一字講明甚熟迨登仕籍以來

業業操持未嘗有墜今伏荷皇上天語諄諄恩若父子自非木石能不奮勵臣之區區但當矢堅素履罄竭猷爲爲祖宗謹守成憲不敢以臆見紛更爲國家愛養人才不敢以私意用舍此臣忠皇上之職分也仍望皇上思祖宗締造之艱念皇考顧遺之重繼今益講學勤政親賢遠姦使官府一體上下一心以成雍熙悠久之治臣愚幸甚天下幸甚奉聖旨覽卿奏謝知道了禮部知道

兩宮尊號議

今日伏蒙皇上召臣至平臺面諭臣曰皇后是朕嫡母皇貴妃是朕生母尊號上先生可多加幾字欽此臣仰見我皇上大孝根心純切懇至臣連日方欲以此上請但以大行皇帝尊謚大禮尙未告成故未敢先請茲蒙面諭臣不勝悚仄恭惟聖母皇后儷體先帝表正宮闈聖母皇貴妃誕毓聖躬翊宣坤教恩隆罔極德並無疆誠宜各極其尊稱乃可仰慰乎聖孝但係國家重大典禮臣之愚昧豈敢擅專伏乞勅下禮部會同多官參考前代禮文仰稽祖宗故事議擬具奏容臣再加斟酌上請聖裁庶足以光昭一代之盛典仰成皇上之大孝乎奉聖旨禮部會同多官議擬來說

謝賜玉帶疏

今日該文書官尙文口傳聖旨先生忠心爲國特賜光素玉

帶一圍齋捧到閣臣謹叩頭祇領訖伏念臣猥以虛庸早參
密勿屬真主龍飛之始首文僚振鷺之班依乘偶會于風雲
遇合深投于魚水皇上念臣才雖猶眾心實無他嘗恭承憑
几之言可不孤負展之託內臺賜見兩塵綸綍之溫諄中禁
分珍屢拜篚筐之稠疊豈期異數洊逮微踪獎以忠心已荷
隻字袞袞之重錫之聲帶更驚萬釘玉質之輝追琢其章溫
潤而栗龍精炳朗渙頒寵踰于緇衣虹彩紛綸祇翫光騰於
紫閣願惟譚質冒此殊恩感奚啻於九遷懼實深於三禩臣
謹當比德於玉用書諸紳道不下視而自存必匪躬乃可報
主帶則有餘而若礪一舉手不敢忘君惟俯殫犬馬之忱庶

仰答乾坤之造

看詳禮部議兩宮尊號疏

伏蒙發下禮部一本內稱會議兩宮尊號謂前代禮文典制
不同稱謂無據仰稽我祖宗舊典惟天順八年憲宗皇帝尊
嫡母皇后為慈懿皇太后生母皇貴妃為皇太后則與今日
事體正為相同但於嫡母特加二字而於生母止稱皇太后
則尊尊親親之別也然今恩德之隆既為無間則尊崇之禮
豈宜有殊且臣居正恭奉面諭欲兼隆重其禮各官仰體孝
思亦皆樂為將順今擬兩宮尊號於皇太后之上各加二字
並示尊崇庶於祖制無愆而於聖心亦慰又謂先朝母后徽

稱有加至四字六字八字者皆因朝廷有大慶典以漸致隆如大婚禮成誕生皇子之類其初則止於二字乃定制也今聖母福壽無疆皇上萬年御歷將來吉祥喜慶之事將層見疊至尊號微稱有加無已固不在此時之驟增也臣居正愚昧仔細看詳各官所擬揆之情禮似爲允當伏望聖明裁酌俯從眾議先期奏聞二聖母並加尊稱以成大孝禮部奉聖旨這典禮既經多官會議停當兩宮聖母徽號依擬於皇太后之上並加二字以盡朕尊尊親親至情內閣擬來看

請諭戒邊臣疏

臣看得北虜連年款塞目前雖若安甯然虜情叵測戒備宜謹況今國有大故或啟戎心隆慶元年之事可爲鑒戒臣愚伏望特勅兵部令其行文各邊總督鎮巡等官秋防在邇比常務要倍加儆備庶可永保無虞亦以見皇上臨御之初畱心邊事蓋鼓舞振勵之一機也臣謹擬勅稿上進伏乞聖明裁定發下書寫於初六日早朝發行

皇帝勅諭兵部朕荷皇天眷命嗣承大統內治既定外備宜嚴目今邊患雖甯未可恃爲無事爾兵部便行文與各邊總督鎮巡等官秋防伊邇今歲事體比之常年倍宜謹備選將練兵積餉修守等項事務都要著實舉行如有因循怠玩沿習舊套以致債事的都拿來治以重罪決不輕宥你部裏亦

要常差的當人員偵探邊事虜情從實奏報以俟朝廷處畫
如或朦朧誤事一體重治不饒欽哉故諭

遵諭自陳不職疏

該吏部都察院節奉聖諭朕初嗣大位欲簡汰眾職圖新治
理兩京六部等衙門四品以上官俱著自陳去畱取自上裁
欽此臣仰惟皇上渙發德音式序在位欲剔瑕蠹以新化理
意義甚盛然臣愚竊以爲官有崇卑則稱有難易任有大小
則責有重輕今百司庶府之官所分理者一事耳卽有不稱
亦不過一肢病耳若閣臣之職上以輔養君德贊理萬幾下
以表率百僚兼綜庶務一有不稱則化機爲之壅窒庶事爲

之墮墜其爲害豈特一肢之病而已哉臣傲時厚幸受先帝
付託之重荷皇上知遇之隆非不欲捐糜此身以圖報答奈
臣性質闇昧學術空疏雖不敢逞小智以紊舊章而綜理劇
繁力有不逮雖不敢昵私交以樹黨與而老成英俊薦拔未
周雖不敢怙權勢以便身圖而水旱盜賊之時聞吏治民風
之未善徒切憂惶一籌罔効是臣奉職無狀之明驗可見於
此矣乃濫竽政府六年于茲品秩驟躡于孤卿封廕屢叨於
前後則今閣臣之中冒倖忝竊者又莫甚於臣也夫易一棖
不若得一棟評眾臣不若簡柄臣今皇上於百司庶府之官
旣已一一而評汰之矣乃政本之地不加精覈非致理之要

也伏望皇上念內閣爲機衡之地愚臣爲不職之尤特賜罷免以儆曠厥別求賢哲以充任使則大小臣工咸知自勵而於新政亦爲有補奉聖旨卿元輔重臣公忠端慎勳望素隆中外具瞻朕茲嗣位方切倚託宜益展謀猷贊成新治所辭不允吏部知道

請戒諭羣臣疏

茲者大小臣工自陳考察俱已竣事一時朝政始覺更新但人心陷溺已久宿垢未能盡除若不特行戒諭明示以正大光明之路則眾心無所適從化理何由而致臣等謹擬勅諭一道具稿呈覽伏乞聖明裁定發下寫完用寶於本月十六

日早朝特召吏部官捧出集百官於午門外宣諭施行

皇帝勅諭文武羣臣蓋聞理道之要在正人心勸阻之機先示所向朕以冲幼獲嗣丕基夙夜兢兢若臨淵谷所賴文武賢臣同心畢力弼予寡昧共底昇平乃自近歲以來士習澆漓官方刳缺鑽闕隙竇巧爲躡取之媒鼓煽朋儔公肆擠排之術詆老成廉退爲無用謂讒佞便捷爲有才愛惡橫生恩讎交錯遂使朝廷威福之柄徒爲人臣酬報之資四維幾至於不張九德何由而咸事朕初承大統深燭弊源亟欲大事芟除用以廓清氛濁但念臨御茲始解澤方覃銛鋤或及於芝蘭密網恐驚乎鸞鳳是用去其太甚薄示戒懲餘皆曲賜

矜原與之更始書不云乎無偏無黨王道蕩蕩無黨無偏王道平平朕方嘉與臣民會歸皇極之路爾諸臣亦宜痛瀚宿垢共襄王道之成自今以後其尙精白乃心恪恭乃職毋懷私以罔上毋持祿以養交毋依阿澳忍以隨時毋尊昏翕訛以亂政任輔弼者當協恭和衷毋昵比於淫朋以塞公正之路典銓衡者當虛心鑑物毋任情於好惡以開邪枉之門有官守者或內或外各宜分猷念以濟艱難有言責者公是公非各宜奮讜直以資聽納大臣當崇養德望有正色立朝之風小臣當砥礪廉隅有退食自公之節庶幾朝清政肅道泰時康用臻師師濟濟之休歸於蕩蕩平平之域爾等亦皆垂

功名於竹帛繇祿廢於子孫顧不美歟若或沈溺故常堅守舊轍以朝廷爲必可背以法紀爲必可干則我祖宗憲典甚嚴朕不敢赦百爾有位宜悉朕懷欽哉故諭

乞崇聖學以隆聖治疏

竊惟自古帝王雖具神聖之資尤必以務學爲急我祖宗列聖加意典學經筵日講具有成憲用能恢宏治理坐致昇平仰惟皇上睿哲天成英明神授自昔毓德春宮令聞已彰於四海茲者光膺大寶臨朝聽政動容出辭無一不中於禮節用人行政無一不當乎人心中外臣工歡欣仰戴皆以皇上爲不世出之主若從此再加學問之功以講求義理開廣聰

明則太平之業可計日而待也臣等謬以菲陋職叨輔弼伏思培養君德開導聖學乃當今第一要務臣居正又親受先帝顧託追惟憑几之言亦惓惓以講學親賢爲囑用敢冒昧上請今一應大典禮俱已次第修舉時值秋涼簡編可近伏望皇上思先帝付託之重勤始終典學之功乘此清秋將講讀令典亟賜舉行以慰天下臣民之望臣等又查得宏治十八年該大學士劉健等以孝宗皇帝山陵甫畢題請先行日講至次年二月始開經筵奉武宗皇帝聖旨依擬行今先帝梓宮在殯服色不便比及山陵事竣時已迫冬殿庭高曠亦難臨御合無照宏治十八年例勅下禮部於八月中旬擇日

請皇上於文華後殿先行日講容臣等參酌累朝事宜定擬簡便儀注及講讀人員恭請聖裁其經筵會講俟明春首舉行庶聖德日益聖治日隆而臣等犬馬圖報之忱亦可少效於萬一矣臣等不勝惓惓喁望之至奉聖旨覽卿等奏具見忠愛八月擇吉先御日講經筵候明春舉行禮部知道

請酌定朝講日期疏

竊惟講學勤政固明主致治之規保護聖躬尤臣子愛君之悃今開講期近臣等伏念皇上日每視朝朝後又講似於聖體太勞恐非節宣之道若論有益於身心有裨於治道則視朝又不如勤學之爲實務也臣等愚見欲乞皇上每月定以

三六九日視朝其餘日俱御文華殿講讀非大寒大暑不輟講習之功凡視朝之日卽免講讀之日卽免朝庶聖體不致太勞而聖德亦爲有益臣等未敢擅便謹擬傳帖上進伏乞聖明裁覽發下禮部遵行 傳帖聖旨朕方在諒陰哀慕深切日臨朝政心實未安今後除大禮大節并朔望陞殿及遇有大事不時宣召大臣諮問外其常朝每月定以三六九日御門聽政餘日俱免朝參只御文華殿講讀其一應謝恩見辭人員遇免朝之日止於午門外行禮畢卽各供職事不必候補大祥之後還照舊行禮部知道

擬日講儀注疏

照得日講期近臣等謹查照累朝事例酌擬儀注開坐上請伏乞聖明裁定勅下臣等遵行

計開

一伏覩皇上在東宮講讀大學至傳之五章尙書至堯典之終篇今各於每日接續講讀先讀大學十遍次讀尙書十遍講官各隨卽進講畢各退

一講讀畢皇上進煖閣少憩司禮監將各衙門章奏進上御覽臣等退在西廂房伺候皇上若有所諮闕乞卽召臣等至御前將本中事情一一明白敷奏庶皇上睿明日開國家政務久之自然練熟

一覽本後臣等率領正字官恭侍皇上進字畢若皇上欲再進煖閣少憩臣等仍退至西廂房伺候若皇上不進煖閣臣等卽率講官再進午講

一近午初時進講通鑑節要講官務將前代興亡事實直解明白講畢各退皇上還宮

一每日各官講讀畢或聖心於書義有疑乞卽下問臣等再用俗說講解務求明白

一每月三六九視朝之日暫免講讀仍望皇上於宮中有暇將講讀過經書從容溫習或看字體法帖隨意寫字一幅不拘多少工夫不致閒斷

一每日定以日出時請皇上早膳畢出御講讀午膳畢還宮一查得先朝事例非遇大寒大暑不輟講讀本日若遇風雨傳旨暫免

辭免恩命疏

節奉手勅吏部朕嗣承大統內閣輔臣翊贊勤勞茲特加恩少師兼太子太師吏部尙書建極殿大學士張居正加授左柱國進兼中極殿大學士還廕一子尙寶司司丞照新銜給與誥命欽此仰惟皇上光纘丕圖恩隆逮下覃敷大賚首及彌臣此千載一時之盛際也臣敢不祗承休命仰副聖心但念臣猥以凡庸受知先帝早蒙親簡擢寘鼎司官品躋躡于

孤卿封廕累叨於前後逮我皇上嗣位以來鑒臣忠實無他
被以晉接之榮託以首輔之重獎褒賜賚卓越前聞臣夙夜
省循如夢如覺未知何緣際此殊寵伏惟乾坤高厚雖捐糜
此身不足以仰酬其萬一矣乃今特塵綸綍禮數愈隆既錫
以加勳進殿之榮又重以廕典綸章之渥舊恩未報新寵薦
臨將使微臣何修何爲可以稱塞何顏何面可以堪承況左
柱係文品穹階而中極乃殿學峻秩在先朝名德猶不敢居
豈臣之騫愚可容忝竊至若符臺世賞以待有功臣有何勳
庸僥此厚倖夫能薄而位高則易有覆餗之虞勞微而獲厚
則詩有伐檀之刺臣雖極愚自量甚審若不揣分子止足必

將速咎于顛濟此臣所以跼天踏地震懼而不甯者也伏望
皇上憐臣福分已過將至災危察臣控辭甚眞非有矯飾特
回成命俾守舊官庶朝廷名器之隆不致濫予而臣子分義
之正亦獲少安奉聖旨卿勸講春宮弼贊新政獨秉公忠茂
宣勞勩特加恩數用示眷酬宜承成命不必過辭吏部知道

再辭恩命疏

昨奉手勅以閣臣翊贊勤勞加恩臣謬叨輔首蒙被獨隆該
臣具疏辭免奉聖旨卿勸講春宮弼贊新政獨秉公忠茂宣
勞勩特加恩數用示眷酬宜承成命不必過辭吏部知道欽
此臣捧誦綸音仰悉皇上體念臣工微勞必錄臣卽宜遵奉

徐圖稱塞但臣反覆思惟於分甚非所宜於心實不能安用
敢不避煩瀆再申前悃臣惟朝廷慎重名器必自貴近始所
以示大公也人臣雖竭力效勞不敢言功所以昭大分也往
者皇上毓德春宮臣備員內閣提調講讀乃其常職何功之
有焉及皇上應期撫運光膺大寶臣受先帝顧託之重夙夜
兢兢惟以不克稱塞是懼於凡大禮大政皆遵率祖宗彝典
祇奉皇上英斷臣不過鞠躬仰成于下而已又何功之有焉
乃昨承明詔既蒙翊贊之褒茲奉溫綸又荷公忠之獎殊榮
異數疊至薦臨帝眷宸恩愈隆益渥力輕於鴻毛而任重於
泰山恩深於滄溟而報微於涓露臣朝夕省循誠不自知其

死所矣臣聞賞僭則濫及匪人知足乃免於殆辱然賞疑惟
重在明主不失厚下之仁而履盛忘危在人臣必致顛隳之
咎臣所以跼蹐震慄屢控而不止者非以辭榮也乃以避咎
也伏望聖慈俯鑒愚誠特垂俞允收回成命使服舊官則皇
上知臣之深道臣於罪九遷不爲榮百朋不爲重而臣居於
百僚之首有地容身亦可以紓誠効力圖報於萬一矣奉聖
旨卿受遺輔政有安定社稷之功勳廕未足以酬豈可過爲
遜免宜勉承眷命以副朕懷不允所辭吏部知道

三辭恩命疏

昨奉手勅加恩閣臣臣自以勞微賞重分不自安再疏辭免

奉聖旨卿受遺輔政有安定社稷之功勳廕未足以酬豈可過爲遜免宜勉承眷命以副朕懷不允所辭吏部知道欽此臣詞不宣心莫回天聽過蒙眷獎彌切冰兢然臣所以屢控而不止者非以沽名也竊有款悃之愚敢終爲皇上陳之臣惟明君以禮使臣榮其身不若行其志大臣以身率物有諸已乃可求諸人臣謬以庸愚荷蒙皇上眷遇優隆信任專篤寵以師臣之禮日承晉接之榮每事必諮有言必聽是臣之志已行願已遂矣即使臣職居冗散列在庶僚亦足以震耀一時垂聲千載況臣官品已極涯分已逾但懼福薄不能承受耳又何敢過冒非分之恩以速必然之咎耶此臣自揣分

義如此臣又聞古語云朝廷之上讓而處下民猶犯禮晉之大夫范宣子讓其下皆讓載之前史以爲美譚故大臣者民之表也仰惟皇上臨御之初將振舉綱維作新化理頃奉勅諭勉大臣以崇養德望飭小民以砥礪廉隅臣忝爲大臣卽不能樹德隆望挽回師濟之風亦宜思砥行矜名恪守廉隅之節若覲顏濫冒不知止足則瘵素之罪臣實尸之貪進之戒臣先犯之何以率先百僚表正頽俗亦非皇上所以振勵臣工之意也臣抱此二端日夕悚仄用敢冒昧屢懇仰瀆宸嚴伏望皇上曲察愚誠特垂俞允則不惟愚臣微分獲以少安其於聖明新政亦爲小補奉聖旨朕知卿性篤忠貞不因

爵賞而勸但勳廕酬功係累朝彝典原非過制卿宜以承命
爲恭不必固執謙讓所辭不允還著寫勅獎諭風勵臣工賞
銀一百兩大紅紵絲蟒衣一襲彩段四表裏該衙門知道

四辭恩命疏

昨該臣三疏辭免勳廕恩典奉聖旨朕知卿性篤忠貞不因
爵賞而勸但勳廕酬功係累朝彝典原非過制卿宜以承命
爲恭不必固執謙讓所辭不允還著寫勅獎諭風勵臣工賞
銀一百兩大紅紵絲蟒衣一襲彩段四表裏該衙門知道欽
此又該文書房官張孝兩次到閣口傳聖旨欲臣領受臣祇
奉綸音愈增慚悚無地自容念臣素性樸愚恥爲文飾若徒

務廉讓之迹至於瀆擾君父以欺世盜名則其罪尤大又臣
所不敢爲也但自揣分義萬分不能自安故屢控宸嚴冀申
愚款前後所奏字字皆出於肺腸句句直陳其悃悞詎意犬
馬之誠不能動天錫予之隆更出望外旣不解其所已有又
復益其所本無是在愚臣則叨冒之中愈爲叨冒在朝廷則
加恩之外重複加恩矣國家馭臣之柄與人臣自處之道豈
不兩失之乎且賜勅獎諭蓋以臣爲廉而獎之以示勸也若
使臣旣不得遂其辭讓之私又冒此非分之獲則臣爲貪夫
矣貪得之人獎于何有獎貪以勸廉猶卻行而求前也揆之
事理未見其順參之公論必以爲非此臣所以甯冒煩瀆之

罪而不能覩顏承受者也伏望皇上鑒臣愚誠恕臣萬死將前項恩數俯容辭免是皇上知臣之深信臣之篤九鼎百朋不足以喻其榮重矣粉骨捐軀不敢忘報奉聖旨卿屢辭恩命詞意懇至謙讓之風足勵有位茲特准辭以成卿勞謙之美勅諭賞資照前旨行該衙門知道

謝賜勅獎賞疏

今日伏蒙聖恩特遣文書房官內官監太監劉大用頒賜獎諭勅書一道銀一百兩大紅紵絲蟒衣一襲彩段四表裏齋捧到臣私寓臣謹焚香叩頭祇領訖草疏冒陳方懼干乎嚴譴恩綸賁錫乃曲荷乎優嘉精鏐頒御府之珍彩服出尙衣之製聲傳里閭光動簪紳臣猥以庸流被茲殊寵袞職無一字之補璽書塵十札之褒感與愧并懼將榮至臣謹當祇承彝訓矢竭愚忠崇讓獎恬倡百辟和衷之義鞠躬盡瘁贊一人垂拱之休

山陵禮成奉慰疏

臣於十八日伏奉欽命前詣昭陵恭題穆宗莊皇帝神主至卽恭叩元宮見其精固完美有同神造寶城三面俱完工甚堅厚及周視山川形勢結聚環抱比之前日考卜之時更覺佳勝誠天地之奧區帝王之眞宅也十九日辰時奉遷梓宮入皇堂行題主禮畢奉安於獻殿未時掩元宮是日又喜天

張文忠公全集
氣澄爽人物昭融祇役臣工無不欽忭仰惟我大行皇帝仁厚之德貫徹宇宙故得天人協佑事事美成可以上慰兩宮聖母永慕之誠仰成皇上慎重大事之孝矣臣伏思數日之間聖心必爲懸切爲此除候回京之日另行復命外謹先具題奉慰以聞奉聖旨覽卿奏皇考梓宮已入皇堂大事克襄足慰我兩宮聖母哀念朕心深用嘉慰卿爲國忠勤始終備盡朕知道了禮部知道

纂修事宜疏

昨該臣等題請預定纂修實錄官員奉聖旨是禮部知道欽此除欽遵具題外臣等又惟事必專任乃可以圖成工必立

程而後能責效查得隆慶元年六月初一日開館纂修世宗肅皇帝實錄經今六年尙未脫藁雖屢厯先帝聖問迄無成功任總裁者恐催督之致怨一向因循司纂修者以人眾而相推竟成廢閣臣等日食大官之饌茫無一字之補素殫曠職實切兢慚然揆厥所由皆以未嘗專任而責成之故也蓋編撰之事必草創修飾討論潤色工夫接續不斷乃能成書而其職任緊要又在於副總裁官顧掌部事則有簿書綜理之繁直經幃則有侍從講讀之責精神不專職守靡定未免顧此失彼倏作忽輟是以歲月徒悠而績效鮮著也今兩朝並纂二館齊開若不分定專任嚴立限程則因循推推其弊

愈甚臣等看得吏部右侍郎兼翰林院侍讀學士諸大綬禮部左侍郎兼翰林院侍讀學士王希烈原係世宗肅皇帝實錄副總裁官今查各館草槁俱已纂完但未經修飾二臣雖任部堂止是佐理尚有餘功及左春坊左諭德兼翰林院侍讀申時行右春坊右諭德掌南京翰林院事今行取王錫爵職任宮坊事務尤簡皆可以專心著作之事合無責令諸大綬王希烈專管纂修世宗肅皇帝實錄申時行王錫爵專管纂修穆宗莊皇帝實錄每日俱在史館供事仍立爲限程每月各館纂修官務要編成一年之事送副總裁看詳月終副總裁務要改完一年之事送臣等刪潤每年五月間臣等卽

將纂完稿本進呈一次十月間又進呈一次大約一月之終可完一年之事一季之終可完三年之事從此漸次累積然後成功可期其餘副總裁等官陸樹聲等或理部休暇相與討論或侍講優閒令其補湊不必責以程限不致兩妨各館纂修官務以職業爲重公家爲急不得別求差假圖遂私情書成之日分別敘錄但以效勞多寡爲差不復計其年月久近如此庶人有定守事易考成在各官可免汗青頭白之譏而臣等亦得以道曠職素殫之咎矣此雖纂修一事而國家用人之理綜覈名實之道實寓於斯伏惟聖明裁斷勅下臣等遵行再照皇祖歷世四紀事蹟浩繁編纂之工卒難就緒

皇考臨御六年其功德之實昭然如日中天皆諸臣耳目之所睹記無煩蒐索不假闕疑但能依限加功自可刻日竣事合無不拘朝代次序俟穆宗莊皇帝實錄纂成之日容臣等先次進呈卻令兩館各官併力俱纂世宗肅皇帝實錄則兩朝大典可以次第告成矣奉聖旨這纂修事理都依擬行卿等還宜督率各官上緊用心編纂用成兩朝大典稱朕光照前烈之意該衙門知道

謝賜貂鼠疏

伏蒙皇上念臣等日侍講讀時值冬寒特賜臣居正貂鼠皮六箇臣調陽貂鼠皮二箇臣等謹頓首祇領訖仰惟皇上天

縱睿資日新聖學雖值沍嚴之候尙勤講習之功臣等但愧經術空疏無裨啟沃敢以風寒奔走自愛髮膚豈意聖慈曲垂軫念珥貂寵錫恩尤重於解衣溫綈傳宣煖已逾於挾纊昔宋祖開疆重武遠頒介冑之臣今明主稽古右文特賜章縫之侶茲爲曠典實邁前聞臣等敢不罄竭悃誠寅恭夙夜敷陳仁義之道必見效於日就而月將簡求侍從之儒期不至於十寒而一暴

辭免筵宴疏

先該禮部題本月二十六日開館纂修穆宗莊皇帝實錄查得累朝舊例先於本部欽賜筵宴次日入館今次監修等官

亦合照例筵宴奉聖旨是欽此臣等竊照纂修賜宴固累朝
彝典但今元象垂戒伏聞皇上在宮中齋心露禱減膳徹樂
又特諭百官痛加修省臣等夙夜皇皇方切兢惕豈敢爲此
飲食宴樂之事非唯於禮有不可於心亦實有不安也且一
宴之資動至數百金省此一事亦未必非節財之道伏望皇
上俯鑒臣等愚衷特免賜宴只於二十六日照常開館供事
以少見臣等兢懼不敢自甯之誠臣等無任惶恐俟命之至
奉聖旨卿等以修省辭宴具見慎重准辭免辦禮部知道

議處黔國公沐朝弼疏

伏蒙發下兵部三法司會議原任雲南總兵官黔國公沐朝

弼罪狀一本內稱朝弼罪惡顯著法應處死臣等看得朝弼
稔惡有年世宗皇帝時卽欲拏問重處但以其元勳後裔未
忍卽寘於法止於罰住祿米隆慶二三年間屢經撫按及科
道官論劾先帝亦不忍加刑止令革任閒住朝弼乃不知感
恩省改作惡愈甚謀害親子擅殺無辜揆其情罪處死不枉
但其始祖三世皆有大功於國家曾關給鐵券子孫許免一
死非有反逆實迹似應稍從寬宥待以不死庶爲情法之中
夫因其有罪而逮問之旣足以破奸宄之膽念其先功而寬
釋之又足以彰肆赦之恩國法皇仁兩得之矣兵部法司奉
聖旨你每說的是沐朝弼屢抗明旨積惡多年擅殺無辜情

罪深重本當依律處死但念元勳世裔姑從輕著革去冠帶
爲民押發南京隨住還著內外守備衙門羈管何文等併蔣
福等撫按官問擬具奏

謝御筆大書疏

茲者伏蒙皇上親灑宸翰賜臣居正元輔大字一幅良臣大
字一幅臣調陽輔政大字一幅臣等恭捧天章不勝欽戴仰
惟皇上天縱睿資日勤聖學至於操觚染翰雖作聖之餘功
亦莫不究其精微窮其墨妙一點一畫動以古人爲法臣等
每侍幃幄輒欣仰欽服不能自己茲者所賜大至盈尺運筆
尤難乃裁自聖心不由摹擬比之常日所書更爲佳妙且筆

意遒勁飛動有鸞翔鳳翥之形信所謂雲漢之章翰墨之寶
也顧臣等淺薄謬蒙眷獎恭觀之餘欣愧交至謹各摹臨入
梓懸扁居第晨夕瞻仰如對天顏其御書真蹟當什襲珍藏
永爲世寶

再謝御書疏

伏蒙皇上親灑宸翰賜臣爾惟鹽梅大字一幅汝作舟楫大
字一幅該文書房官王宦恭捧到閣臣謹叩頭祇領訖仰惟
皇上聖哲夙成英明天挺必得名世俊乂之佐乃爲格心啟
沃之資臣猥以虛庸謬膺簡任雖葵忠自許心恆切於傾陽
而奮力難勝懼每深於履薄乃蒙皇上寘諸左右託以股肱

引文思公全集
三
前既承良臣元輔之褒茲復荷舟楫鹽梅之寄渥恩踵至眷
顧彌隆寶墨淋漓宛降從於天上瓊章燦爛忽光動於人間
卓然雲漢之昭回矯若鳳鸞之翔翥寵榮洵被感愧交并臣
敢不景行前修對揚休命孜孜納誨罔少懈於夙宵汲汲求
賢式欽承乎德意期少効濟川調鼎之用庶以答天高地厚
之恩

漢陽易鍾
邑人田慎校

